

弘

簡

錄

弘簡錄卷一百十四

功臣 宋三之一

石守信

子保興

王審琦

子承衍

高懷德

張元翰

韓重贊

子崇訓

李處耘

子繼隆 和孫昭亮

羅彥瓌

楚昭輔

李漢超

子

馬仁瑀

韓令坤

父倫

張令鐸

慕容延釗

子德琛

李崇矩

子繼昌

王彥昇

姚內斌

董遵誨

賀惟忠

郭進

牛思進

石守信開封浚儀人初事周祖遷親衛都虞候從世宗征晉陽

力戰高平從征淮南爲先鋒下六合克揚州累遷親衛左第一

軍鐵騎都校領嘉州防禦使從征關南以功遷殿前都虞候恭

帝加義成軍節度使時帝方七歲中外物情携貳而宋祖累立大功威名益盛法令嚴明士卒畏服人情歸附密有推戴之意會與高懷德張令鐸王審琦張元翰趙彥徽同從宋祖幸禁兵往禦漢初發汴京至夕抵陳橋驛守信首謀語諸將曰主上幼弱我輩出死力破敵誰則知之不如先立點檢爲天子然後北征都知趙匡義及歸德掌書記趙普共以事理曉之諸將不可將旦率軍士集驛門宣言點檢爲天子守信等排闥入以黃袍加太祖身羅拜呼萬歲擁逼還汴受命禪位以功戴功遷侍衛馬步軍副都指揮使領歸德軍節度使討李筠破其衆于長平斬首三千級又于澤州破三萬衆獲僞河陽節度范守圖降太原卒數千皆殺之澤潞平以功加同平章事親征李重進拜行營都部署兼知揚州行府事次大儀鎮守信馳奏旦夕城旦

破大駕親臨一鼓可平帝亟赴之果克揚州天下既定守信等

皆故人典禁衛兵太祖嘗與趙普議罷諸將兵柄

語前後備載弘道錄

尚未有以發會普數以爲言太祖曰彼等必不吾叛卿何憂之

深耶普曰臣亦不憂其叛但數人皆非統御才恐不能制伏其

下萬一軍伍間有以黃袍加身者臨時豈得自由乎帝大悟明

日守信等皆稱病乞罷典兵詔各以散官就第厚資資之惟守

信居職如故其實兵權不在也開寶六年兼侍中太平興國初

兼中書令行河南尹西京留守三年加檢校太師四年從征范

陽督前軍失律降崇信軍節度復官封衛國公七年徙鎮陳州

幾年五十七贈尚書令追封威武郡王諡武烈守信在鎮專務

聚斂與韓重贇信奉釋氏各建寺宇募民輦瓦木畢迫甚急而

備直不給人多苦之子保興字光裔蔭補供奉官遷尚食副使

太祖詢以時事奇其應對明白拜如京使領順州刺史太宗征河東爲御砦四面都巡檢使雍熙初契丹擾邊爲涇州前軍駐泊李繼遷入鈔徙銀夏綏府都巡檢嘗巡崧子砦並黑水河夏人據險引數千騎渡河求戰保興所部不滿二千乃分短兵伏於河許俟其半渡擊之斬首百餘級追北數十里優詔褒美淳化五年真拜蘄州團練使永興軍鈐轄至道二年徙延州充本路副都部署與范廷召等五路討賊挺身持滿麾衆出入陣中且行且鬪凡三日四十二戰賊遂引去咸平二年知威武軍會夏人入鈔發官錢數萬緡分給戰士賊退願以家財償之真宗貸而不問就拜棣州防禦使徙知邢洺二州頗峻刑罰卒年五十八保吉尚主 孫元孫字善良以蔭爲東頭供奉官閤門祇候遷如京副使仁宗改文思副使勾當法酒庫改涇州巡檢知

莫州有治迹又徙保州兼廣信安肅軍緣邊都巡檢遷西上閤門使并代州兵馬鈐轄歷侍衛親軍步軍殿前都虞候鄴廷副都總管緣邊安撫邕州觀察使康定初夏人寇延州領兵出境戰于三川口軍敗見執初疑已死贈官錄子元昊納欵縱歸御史劾奏以爲辱國應斬賈昌朝引春秋時晉獲楚將穀臣楚獲晉將知瑩還皆不誅魏志于禁敗獲而還亦不深罪乃貸元孫安置全州後卒

王審琦字仲寶遼西人徙洛陽爲人重厚有方略善騎射初隸周祖帳下性純謹甚見親任從平李守貞以功署左番副將歷東西班行首內殿直都知鐵騎指揮使世宗征淮南審琦以精騎下舒州救黃州又破南唐軍於紫金山從圍濠州又攻楚州又從平瓦橋關功皆最恭帝遷殿前都虞候領睦州防禦使宋

初進殿前都指揮使領秦寧軍節度使從征李筠除御營前洞  
屋都部署爲飛石所傷駕臨視之澤潞平改節武成軍征李重  
進爲前軍副部署建隆二年出鎮中正軍蒞治八年政尚寬簡  
所收租課量入爲出未嘗有所誅求錄事有所部邑令不先咨  
府輒以罪停其錄事吏幕僚請按之審琦言五代以來諸侯強  
橫令宰不得專縣事今天下治平我忝守藩維而郡內宰能尸  
去黠吏誠可嘉尚何按之有聞者歎服從征太原爲御營四面  
都巡檢開寶三年改鎮許州賜甲第留京師六年加同平章事  
恭疾薨年五十帝幸其第哭之廢朝贈中書令追封琅琊郡王  
子九人承德西上閣門使會州刺史承祐如京使承俊承傑內  
殿崇班承儼閤門祇候承僅左神武將軍承休內殿承制承衍  
尚主 承衍字希悅初授閤院使因賜袍帶出監徐州軍改如

京使表求自效歷知潭延代并四州皆兼兵馬鈐轄改永州刺史復歷涇與秦及天雄軍進秩東上閤門使轉左武衛大將軍知壽州卒年四十九爲人涉學喜爲詩曉音律多與士大夫遊于世京孫克臣字子難登進士通判壽州坐盜發不覺貶監潭州稅熙寧中爲開封度支二判官遷鹽鐵副使又坐薦鄭俠且餽之金奪官復起爲戶部副使以集賢脩撰知郕州京東多盜請以便宜處決盜爲少襄河決曹村亟集隄城下水至不沒者纔尺餘復起司道屬之東平王陵埽事寧家繪像祀之進天章閣待制徙知瀛州有告外間入境陰緩之已而獲于他道徙知太原拜工部侍郎終龍圖閣直學士大中大夫年七十二高懷德字藏用行周之子自幼儻武勇晉開運初始冠從父領兵至戚城遇遼軍被圍數重懷德左右射縱橫馳突衆皆披



靡挾其父而出以功領羅州刺史賜裘帶名馬以寵異之父歷  
延潞二鎮留守洛都節制宋毫皆署牙職由東西班改領吉州  
刺史遷鐵騎都指揮使世宗拒劉崇捷高平征淮南戰廬州皆  
從一日世宗按轡淮壩覘賊勢見一將追擊賊衆奪梁還問之  
乃懷德也召至慰勞許以節鉞北征命率兵先抵滄州初得關  
南又命副陳思讓爲兵馬都部署進克瓦橋關恭帝擢侍衛馬  
軍都指揮使領江寧軍節度從宋祖北征爲北面行營馬軍都  
指揮使禪位拜殿前副都點檢領義成軍節度使移鎮滑州充  
關南副都部署時太祖妹燕國長公主初適米福德而寡乃再  
尚之於駙馬都尉賜第興寧坊征李筠率所部先進破其衆于  
澤州前以功遷鎮忠武軍檢校太尉平揚州又改歸德軍開寶  
六年公主薨太祖臨奠輟朝諡以恭懿加同平章事太宗卽位

兼侍中檢校太師從平太原改鎮曹州封冀國公終武勝軍節度使年五十七贈中書令追封渤海郡王諡武穆爲人忠厚簡率不拘小節本將家子練習戎事頗好畋獵嘗露宿野次兼善音律自爲新聲度曲務極精妙子處恭歷莊宅使至右監門衛大將軍處俊至西京作坊使 同時張光翰後唐山南節度使虔釗兄子領江寧軍節度使趙彥徽真定安喜人與太祖同事世宗太祖以兄事之領武信軍節度使及卒各贈侍中

韓重贇磁州武安人少武勇隸周祖麾下補左班殿直爲副都知世宗戰高平以功遷鐵騎指揮使從征淮南先登轉都虞候俄遷控鶴軍都指揮使領虔州刺史宋初以翊戴功擢龍捷左廂都校領永州防禦使征澤潞還爲侍衛馬步軍都指揮使領江寧軍節度使討李重進爲行營馬步軍都虞候建隆二年改

毀前都指揮使復領義成軍三年發京畿丁壯築皇城東北隅并繪洛陽宮殿按圖脩之命董其役乾德三年河決澶州督衆數十萬塞之四年郊祀爲儀仗都部署有譖其私取親兵爲腹心者上怒欲誅之趙普諫曰陛下親兵必不自將決須擇人若以讒誅重貲卽人人懼罪誰復爲陛下將者上納其言得免出爲彰德軍節度使會征太原過其郡重貲迎謁上曰契丹知我是行必率兵來援由此路入卿爲我領兵倍道兼行出其不意破之乃命爲北面都部署先令軍士銜枚夜發果遇契丹兵于定州見其旗幟大駭重貲乘之大破其衆太祖大喜優詔褒美卒贈侍中 子崇訓字知禮蔭補供奉官遷西京作坊使知澶州河南北都巡檢征河東還權知麟州雍熙中李繼遷寇夏州領兵赴援大敗之歷知越泉登莫四州改如京使咸平初出知

石州由河南徙閩越再移北邊以勞擢西上閤門使邠寧環慶  
清遠軍都巡校使徙鎮定高陽關行營鈐轄兼河北都轉運使  
契丹寇威武軍崇訓陳兵唐河拒其要路移并代鈐轄植知并  
州從部署張進領兵由土門會大將王超襲破契丹于定州六  
年授四方館使樞密都承旨景德初陳兵河南與王超追襲契  
丹至鎮州爲人長厚謙畏未嘗作物終檢校太傅右龍武大將  
軍年五十六子允恭禮賓副使有謀略好學能世其家 崇業  
字繼源以蔭補供奉官初尚秦王女雲陽公主授左監門衛大  
將軍駙馬都尉後降秩削王位號從貶房陵真宗初入朝改左  
屯衛大將軍卒年四十一

李處耘潞州上黨人父肇仕後唐至檢校司徒從討王都戰死  
處耘尚幼隨兄處疇至京師遇張彥澤斬關入縱士卒剽略時

處耘猶未冠，獨當里門，射殺數人，賊無敢當者。暮退，迨晚復鬪，又殺數人，里中奇之。漢初，折從阮帥府州，委以軍務，歷鄧滑陝邠四節度處，耘皆從。折氏甥誣告其罪，從阮表雪，詔復隸麾下。顯德中，李繼勳鎮河陽，署以右職，稍委郡務，俾掌河津，獲契丹謀者，并西川江南蠟書送闕。時宋祖領殿前親軍收隸，帳下補都押衙會太祖，駐軍陳橋，處耘見軍中密謀，推戴亟白。匡義與王彥昇謀召馬仁瑀、李漢超等，定議入白太祖，拒之。俄諸軍大譟入驛門，遂不能却。處耘臨機處決，謀無不中。太祖嘉其功，授客省使兼樞密承旨、右衛將軍，從平澤潞，遷羽林大將軍，宣徽北院使。討李重進，爲行營兵馬都監。江南平，就知揚州，值大兵後，境內凋弊，勤於綏撫，奏減城中居民屋稅，衆心悅服。後詔還京，老幼遮道泣留。累日，改宣徽南院使兼樞密副使，賜甲第，朗

州軍亂命與慕容延釗往討以爲都監辭曰親授方略令何便就圖荆南高繼冲處耘至襄州先遣丁德裕以假道爲名請具薪木給軍繼冲辭以民懷恐懼願供芻餼于百里外遂次荆門繼冲遣其叔保寅與軍校梁延嗣牽牛酒來犒師且覘動靜處耘待之加禮二人大喜令報繼冲無虞是夕延釗召保寅等飲帳中處耘密將輕騎倍道前進繼冲不虞大軍奄至惶怖出迎遇於江陵北十五里處耘揖繼冲令待延釗遂率親兵先入登北門北繼冲至則兵已分據城中束手聽命卽調發江陵卒萬餘并其師晨夜趨朗州遣諸將武懷節趨岳州大破賊于三江口獲船七百餘艘斬首四千級又敗張從富於澧江逐北至敖山砦賊棄砦走俘獲甚衆延釗大軍繼至朗帥周保權匿於僧寺遣將田守奇獲之遂入潭州盡得荆湖之地初處耘入江陵

令軍中悉由中路有擅入民舍者坐之會延釗部下小校及圉人犯令名鞭其背山是不協更相論奏朝議以延釗宿將貫其過謫處耘淄州刺史處耘懼不敢自明在州數年卒年四十七贈檢校太傅宣德軍節度使賜葬洛陽爲人綽有器度善懷世務以功名爲已任既受上知遇思有以報故臨事專制不顧羣議遂至於貶太祖頗追念之爲太宗納其次女爲妃卽明德皇后也處疇官至作坊使子繼恂至洛苑使順州刺史繼隆字霸圖善騎射曉音律好讀春秋左傳喜名譽禮賓士蔭補供奉官蜀平選爲果閫監軍母憂其未更事對曰兒當自立願不以爲慮夜涉棧道與馬偕墜絕澗深十餘丈絀於大樹騎卒取火引縋山之征江南以勇敢聞領雄武卒三百戍邵州手足俱中毒矢會得良藥不死命與石賊襲襲州破桃田砦追賊二十里

焚其梯衝芻積復從李符督荆湖漕運給征南諸軍吳人以舟  
師山斷餉道繼隆力圖糧得達太祖察其才欲拔用之謂曰昇  
州平可持捷書來當厚賞汝會有機事繼隆述詣闕時城尚未  
下太祖訝其來驛奏曰金陵破在旦夕途中遇大風晦冥此其  
兆也翌日捷奏至召語曰汝言驗矣錄功遷淮宅副使幸西洛  
改御營前後巡檢使太宗立特被親信太平興國二年轉六宅  
使護浚京西河及治決河征太原爲四面提舉都監領櫓衝地  
道討幽州圍范陽皆領先鋒破契丹數千衆于湖翟河南後爲  
鎮州都監與趙延進從宣布陣敗契丹于徐河四年遷宮苑使  
領媯州刺史征北邊破靈丘縣盡略其人以歸改定州駐泊都  
監山土鎡砮詔書褒美李繼遷叛率兵出銀州北破悉利諸族  
追奔數十里斬三千級俘蕃漢老幼千餘梟代州刺史折羅遇



及其弟理乞首。又出開光谷西杏子坪。破保守保香族。斬其副首領理也。已降銀三族。首領折八軍等三千餘衆。復破沒卻浪。悉訛諸族。及濁輪川。兔頭川。生擒俘斬以千計。吳移越移四族。聞之來降。惟吳加羅賦十四族。怙衆不下。與尹憲襲擊之。平其帳千餘。俘斬七千餘級。擢環州團練使。護高陽。屯兵從曹彬征幽州。助先鋒薛繼昭破契丹衆於固安。進克涿州。獲貴臣一人。命知定州。尋詔諸軍分屯。令書吏盡錄詔語。旬餘傳潛米信等敗。卒集城下。不知所向。因按詔給券。俾各持詣所部。上益嘉其有謀。遷侍衛馬軍都虞候。領武州防禦使。端拱初。授侍衛馬軍都指揮使。領保順軍節度使。定州都部署。契丹驟至。與護軍袁繼忠擊走之。威武軍鄒果屢爲蕃兵邀截。朝廷欲廢其軍。繼隆言不可。而止。淳化初。上密諭欲親征契丹。繼隆諫止之。改節。

靜難軍兼河西行營都部署李繼捧與繼遷連謀又絳州牙校  
高文岷舉城效順河外大擾詔出師討之繼隆自鐵荊驛夜入  
絳州謀其所向欲徑襲夏州或謂我兵少恐不能克不若先據  
石保以觀賊勢繼隆曰我以兵少出其不意彼不知我衆寡若  
先據石保兵形已露豈能進耶引兵馳入撫寧縣繼捧猶未知  
遂進夏州繼捧狼狽山迎禽以歸獻于朝繼遷遁去先時送糧  
赴靈州必由旱海路繼隆請由古原州蔚茹河路便率師以進  
令如京使胡守澄城之是爲鎮戎軍至道二年爲靈夏十州都  
部署同五路出師坐失期削秩其宗改節鎮安軍檢校太傅同  
中書門下平章事解柄歸鎮內艱起復加檢校太師山南東道  
節度使判許州幸洧澗命爲駕前東西排陣使陳師北城外上  
見其所部整肅歎賞久之翌日幸營中召從臣飲宴還京加開

府儀同三司卒年五十六車駕臨哭贈中書令諡忠武錄其子  
昭遜內殿崇班及門下二十餘人乾興初配享真宗廟庭繼隆  
自起貴胄感慨自樹深沉有城府嚴於御下多以智計謙謹克  
保其身明德太后寢疾欲面見之有詔入省但詣萬安宮門拜  
牋終不敢入上又命諸王詣第候謁不自設湯茗第假王府從  
行茶爐烹飲焉 子昭慶改名昭亮字晦之四歲補東頭供奉  
官許出入禁中遇父北征遣往來馳問方略及營陣聚寡之勢  
時年尚少還奏稱旨累遷西上閣門使出爲潞州兵馬鈐轄徙  
領麟府軍馬事尋爲管勾軍頭引見司兼三司衙司按發軍士  
逃死而目請官廩者領高州刺史知代州遷四方館并引進使  
歷知瀛定二州成州團練寧州防禦感德軍節度觀察留後殿  
前都虞候秦鳳路馬步軍副都總管經略招討副使徙永興路

馬步軍副都指揮并代副都總管安撫副使守代州再徙真定  
路都總管保州兵叛遣王果招降叛卒呼曰願得李步軍來昭  
亮乃從輕騎數十人不持甲盾弓矢詣城下相率開門降改淮  
康軍留後復知定州敕使勞問賜黃金三百給節度使俸以褒  
其功明年拜武寧軍節度使殿前副都指揮使時承平久宿衛  
縱弛昭亮政尚嚴肅黥配不貸諸軍股慄久之以宣徽北院使  
判河陽澶州大名徙延并二州拜同中書門下平章事仁宗以  
望金紋羅書李昭亮親賢勲舊以賜累鎮天平彰信泰寧三軍  
老疾願還終景靈宮使贈中書令諡良僖爲人和易練習近事  
通敏吏治善委任僚佐以故數更藩鎮無他過犯 子惟賢字  
寶臣蔭爲三班奉職遷閤門祗候通事舍人西上閤門使領高  
州刺史知莫州召還提舉諸司庫務領榮州團練使知翼州徙

恩州終四方館使仁宗以其善宣辭令習朝儀頗愛之。繼和  
字周叔蔭補供奉官三遷洛苑使從兄繼隆在邊友愛尤至每  
令入奏機事時繼隆請城鎮戎軍廷議未決繼和上言鎮戎爲  
涇原儀渭北面扞蔽又環慶原渭儀秦熟戶所依正當回鶻西  
涼六谷吐蕃咄連賤遇馬賊梁家諸族之路自置軍已來克張  
邊備比於至道中所葺今已數倍誠能常用步騎五千守之涇  
原渭州苟有緩急于此軍并力戰守則賊必不敢過此軍而緣  
邊民戶不廢耕織熟戶老幼有所歸宿又朝廷北禁青鹽正困  
賊良策所禁非徒糧食至於兵甲皮幹之物其名益多以朝廷  
雄富猶言摘山煮海一年商利不入則或闕軍須况蕃戎所賴  
止有青鹽禁之則彼自困矣後領兵殺衛理族於天麻川自是  
隴山外諸族皆恐懼內附因請移涇原部署於鎮戎以壯軍勢

真宗以其精心戎事甚嘉之爲人習武藝好方略頗知書所至  
幹治兄常語以不墜吾門在爾然性剛忍御下少恩部兵終日  
環甲常如寇至及校閱之際校罰過當人多怨焉真宗屢加勗  
勵駕駐澶淵與魏能張凝領兵赴趙州躡敵後卒年四十六贈  
鎮國軍節度使遣諸王宗室咸赴弔一子早卒帝以其族大遷  
三班使臣爲主家事 丁德裕洺州人周彰武軍節度使審琦  
之子以蔭補供奉官宋初歷通事舍人西開門副使東開門使  
論功加引進使後與潘美尹從珂克郴州遷客省使成都平用  
爲西川都巡檢與開門副使張延通同率師討平輩寇擒賊帥  
康祚礫於市以與延通不協出知潞州貶房州刺史

羅彥瓌太原人父全德晉沁州刺史以蔭補內殿直開運初契  
丹圍大名少帝幸澶州欲資詔宣慰大名城守特選勇敢士十

人彥瓌與王彥昇同應募銜枚夜發衝突而入往返如期各遷  
近職開運末命送廐馬千匹赴幽薊至元氏間漢祖起以馬歸  
太原漢祖嘉之入斥擢爲龍聖指揮使周初山散員都虞候爲  
馬步軍都軍頭從向訓收秦鳳有功遷都虞候陳橋之變諸將  
整兵擁太祖自仁和門入俄頃宰相范質等至尚未及對彥瓌  
挺劍而前厲聲曰我輩無主今日必得天子太祖叱之不退質  
等相對無言事定論功擢爲檢校左廂都指揮使改內外馬軍  
都軍頭領眉州防禦使從平澤潞破李筠衆於礮子谷遷爲侍  
衛步軍都指揮領武信軍節度使建隆二年出鎮彰德軍乾德  
二年復改安國軍與李繼勳大破契丹兵四年春又與田欽祚  
殺太原軍千餘人于靜陽禽其將鹿英等獲馬三百匹明年移  
鎮華州開寶二年卒年四十七

楚昭輔字拱辰宋城人少事華帥劉詞詞卒來京師問卜於警者劉悟悟曰子當遇貴人見奇表豐下者卽汝主也宜謹事之果見宋祖狀貌如悟語遂委質焉以才幹稱在麾下甚信任之陳橋師變太祖憂母杜氏在城中首遣昭輔慰安家人兼問起居時殿前都點檢公署在左掖門內方閉關設守備昭輔至開關稱之具言士衆推戴之狀家人乃安及受禪擢軍器庫使討澤潞征淮揚並以爲京城巡檢使建隆四年權知揚州使江表還命鈞校左藏庫金帛條對稱旨帝能其心計拜左驍衛大將軍權判三司開寶六年遷樞密副使九年權宣徽南院事太宗卽位拜樞密使三年加檢校太傅從征太原論功加太尉足疾請告帝臨問以所居湫隘命廣之慮侵民地因讓帝嘉其意賜金別市卒年六十九廢朝贈侍中命中使護喪歸葬無子錄兄



子吉供奉官敏殿直昭輔爲人勤介人不敢干以私前後賜予萬計悉聚而畜之嘗引賓舊縱觀曰吾無汗馬勞徒以際會得此今但爲國家守行且獻之後悉以市田宅吉子隨敏子咸並進士及第隨爲太常博士咸屯田員外郎咸平三年又錄弟子諒爲借職祥符八年錄從孫鼎右班殿直

李漢趙雲中人初事鄴帥范延光鄆帥高行周皆不見信用會周世宗鎮澶淵委質焉卽位補殿前指揮使三遷殿前都虞候以從北伐隨衆預推戴謀遷散員都指揮使控鶴左廂都校領綿州刺史恩州團練使平李重進改齊州防禦使兼關南兵馬都監有民訟強取其女爲妾及貨物不償者太祖問汝女可適何人對曰農夫又問前漢趙未至關南時何如曰歲苦契丹侵暴今復爾耶曰否帝因貴之曰漢趙朕貴臣汝女爲其妾不猶

愈於農婦乎我不遣漢超守關南汝尚能保其家之所有耶趙之去已乃密諭漢超亟還其女并所貨曰朕姑貴汝勿復爲也不足於用何不以告朕耶漢超感泣誓以死報在郡十七年政平訟理吏民愛之詣闕求立碑頌德詔徐鉉撰文以賜漢超紫與馬仁瑀善嘗兄事之仁瑀擅發麾下卒入趙境剽奪人畜漢超力討由是交惡太祖慮其生變遣中使和解賜以金帛太平興國初遷應州觀察使判齊州終關南都巡檢使贈太尉忠武軍節度使生平善撫士卒與共甘苦漢超死士多流涕者子守恩少驍果善戰有父風初補齊州牙職從征太原會契丹援兵至定州西嘉山領牙兵數千戰敗之斬首三千級擒首領二十七人獲戰馬器甲甚衆隨父見于行在時年尚幼賜戎服金帶器幣緡錢太祖語左右曰他日將帥才也擢爲驍猛軍校累

官隴州刺史知靈州與運使陳緯部芻糧過瀚海守恩爲賊所邀及其子象之望之弟守忠皆沒真宗聞之震悼特贈守恩洪州觀察使次子祐之順之用之潤之慶之成之藏之

馬仁瑀大名夏津人幼時不願就學集里中羣兒戲爲行陣之狀及長善射挽弓二百斤周祖素聞其勇募隸帳下補內殿直嘗在左右世宗命教衛士習射所發多中賜錦袍銀帶高平之戰師初不利仁瑀督衆曰主辱臣死安用我輩卽控弦躍馬挺身出陣射殺數十人士氣大振大軍繼之遂敗劉崇擢爲捧鶴弓箭直指揮從征淮南功楚州水砦中建飛樓望卒厲聲嫚罵世宗怒命射之衆以爲遠仁瑀引滿應弦而隕及平身被數十創賜以良藥還內殿直都虞候又從平三關預受禪議除散員都指揮使領貴州刺史歷鐵騎右廂虎捷左廂及扶州團練使

平澤潞有功領常州防禦使改龍捷左廂建隆二年詔領荆湖  
諸郡真授岳州防禦使移漢州不數歲盡復其地將征蜀又領  
川陝諸郡事平召還王繼勳以后族驕恣凌蔑將帥入皆引避  
仁瑀獨不相下會將大閱各陰勒所部兵欲圖上密知之詔罷  
閱出仁瑀爲密州防禦使征晉陽命率師巡邊至上谷漁陽契  
丹素聞其名不敢出因發兵大掠俘生口牛羊數萬駕還歸郡  
兗州盜起賊首周弼勇悍號長脚龍監軍討捕不利仁瑀率兵  
入泰山擒之盡獲其黨開寶四年遷瀛州防禦兄子醉殺平民  
論如律俄以所私囑知貢薛居正爲劉溫叟所劾帝優容之太  
平興國初知遼州從征太原范陽皆有功又擊契丹於盧龍北  
還授朔州觀察使判瀛州卒年五十贈河西節度使

韓令坤磁州武安人父倫以勇敢隸成德軍累遷徐州下邳鎮

將兼守禦指揮使陳州行軍司馬顯德六年爲驍衛中郎將遷左監門衛將軍宋初拜磁州刺史轉亳州團練本州防禦使卒令坤少隸周祖帳下與宋祖情好親密歷鐵騎散員都虞候控鶴右第一軍都校領和州刺史世宗授殿前龍捷左廂都虞候領容州團練泗州防禦使征太原爲行營前馬軍都校領定武軍節度使同十二將從宰相李穀征淮南穀退保正陽爲吳人所乘令坤與宣祖并李重進合兵奮擊大敗吳人時聞揚州無備詔遣襲之先令白延遇引精騎數百密馳入城令坤繼至卽日撫定民皆按堵獲副留守馬延魯送行在卽命知州事泰州聞風亦以城降時錢俶受詔圍毗陵爲南唐所敗將陞孟俊乘勝逼泰州進軍蜀岡將近揚州令坤棄城還世宗怒命宋祖與張永德領兵趨六合令坤聞援至復入城守擒殺孟俊敗其將

馬貴子楚州灣頭堰擒漣州刺史秦進崇俄副向拱爲緣江招討使下壽州加檢校太尉領鎮安軍節度使世宗再幸淮石復令率兵入揚權知軍府事督丁壯築新城又命以汴亳民導汴水入于蔡及將北征命率龍捷虎捷驍武兵先赴大名又副王宴爲益津關一路都部署俄戍霸州宋祖禪位方領兵巡北邊遣人諭意移領天平軍加侍衛馬步軍都指揮使同平章事征李筠率兵屯河陽還錫宴于禮賢殿賜裘衣器幣鞍馬以功加兼侍中討李重進充北面緣邊兵馬都部署改成德軍節度使將赴鎮餞於別殿爲人有才略識治道鎮常山凡七年北邊以寧卒年四十六上聞悼惜素服發哀于講武殿錄其子慶雄爲閑廐副使

張令鐸棣州廐次人少以勇力隸軍伍後唐清泰中補寧衛小

校晉初改隸奉國軍漢乾祐中從周祖平河中遷檢校左廂都指揮使領虔州團練使從世宗征淮南及壽春恭帝授侍衛親軍步軍都指揮使領武信軍節度使宋初遷馬步軍都虞候領鎮安軍節度使征李筠爲東京舊城內都巡檢建隆二年出爲鎮寧軍節度使開寶二年來朝被病車駕臨問卒年六十帝甚悲悼贈侍中爲人性仁恕從軍三十年大小四十餘戰多摧堅陷敵未嘗妄殺一人其第三女適皇弟光美子守正至內園使守恩至崇儀使領綿州刺史孫永安爲大理評事至殿中丞慕容延釗太原人父章襄州馬步軍都校領開州刺史延釗少以勇幹聞隸周祖帳下補西頭供奉官歷尚食副使鐵騎都虞候世宗授殿前散指揮使領溪州刺史高平之戰督左先鋒有功陞虎捷左廂都指揮本州團練使遷殿前都虞候睦州防禦

使征淮南改龍捷左廂都校松江馬軍都部署世家駐江口聞  
吳水艦數百泊東沛洲進爲左神武統軍命引驍騎由陸路進  
宋延僅督舟師松江繼之遂大破敵淮南平遷殿前副都指揮  
淮南節度使恭帝改鎮寧軍充殿前副都點檢與宋祖同官友  
善常兄事延釗北征爲行營馬步軍都虞候以先鋒重兵屯於  
真定宋祖遣使諭旨許以便宜從事加殿前都點檢同中書門  
下三品數遣問勞猶以兄呼之其治邊境以鎮靜聞征李筠與  
王全斌山東路進俄爲行營都部署知潞州行府事平加兼侍  
中建隆二年長春節來朝賜宅一區徙山南東道節度西南面  
兵馬都部署大寒遣使賜貂裘百子璫帳南征復爲湖南道行  
營前軍都部署時被病御封藥以賜令肩輿卽戎荆湘平加檢  
校太尉卒年五十一上聞慟哭久之贈中書令追封河南郡王



錄其子德業至衛州刺史德鈞至尚食副使弟延忠內殿直歷  
西頭供奉都知磁州刺史延卿至虎捷都指揮使 子德豐字  
日新幼聰悟父鎮山南八歲補衙內指揮父卒授如京使征太  
原領御砦南面巡檢征南唐爲洞子都監改昇州都監以廉潔  
聞俄領蔚州刺史太平興國二年知愛州兼邠寧都巡檢使嘗  
破小遇族奪名馬數十匹詔書褒諭居任九年簡靜爲治邊鎮  
安之雍熙四年使登萊閱強壯還拜西上閣門使出爲定遠鈐  
轄命領後陣中隊別將萬騎以禦邊屢知邢延慶三州又代侯  
延廣知靈武就賜白金三千兩改四方館使兼部署殺貴出私  
廩賑饑全活者衆轉引進使咸平二年遷客省使知鎮州遼人  
南侵繕兵固守餉饋不絕詔獎之改知滄州爲人輕財好施厚  
享將士身居邊陲母與妻孥尚留京真宗特進潁州團練使詔

給其俸轉知貝瀛二州卒年五十五家無餘財于惟素至殿內承制從于德琛蔭補供奉官累遷內殿崇班知夔州李順黨張餘領衆十萬舟千艘來寇與戰龍山斬首千餘級與白繼贊再進又斬二萬餘悉焚其舟賊剽開州圍雲安德琛往援又斬百餘級累詔褒諭歷西京作坊左藏二副使咸平二年轉崇儀副使荆湖北路鈐轄蠻擾澧鼎境與戰於北汭奪耕牛鎧甲斬馘以歸徙陝路鈐轄未至復知夔州景德中領梧州刺史遷莊宅使并代鈐轄知憲州天禧初改右監門衛大將軍

李崇矩字守則潞州上黨人幼孤貧有至行鄉里推服史弘肇常聞其名召署親吏後弘肇被誅迎其母并弟福于家事之甚謹盡推家財與共周祖素善弘肇求其近屬將恤之不能得訪求故吏獨崇矩在語曰史公與我世受漢恩戮力王室爲姦邪

所構史公罹太禍我得僅免因以崇矩隸世宗帳下補供奉官與宋祖同府厚善每誕辰遣子奉幣爲壽卽位從討李筠李龍捷驍武禁軍數千屯河陽攻拔大會砮斨首五百級改澤潞南面行營前軍都監及平遣先入城收圖籍視府庫父亡尚藁葬淺土奏許護輓歸京帥師還拜右監門衛大將軍充三司使從平李重進爲宣徽北院使仍判三司乾德二年拜樞密使五年加檢校太傅初平劔南值禁軍校呂翰構亂言者請誅其妻子以問崇矩對曰叛亡之徒固當孥戮然案籍合誅者萬餘人恐有被驅脇者太祖悟令盡釋之翰衆聞之稍稍自歸翰尋敗死論者謂崇矩以一言脫萬人之命云從征太原班師爲後殿次常山被病遣醫診視命乘上所御涼車以還叩首固辭崇矩素與趙普厚女適普子承宗帝聞不悅有鄭仲者客崇矩門下陰

波無行乘機告其陰事出爲鎮國軍節度使太平興國二年河  
決詔乘傳自陝至滄棧按行河堤又爲邕貴潯賓橫欽六州都  
巡檢使移瓊崖儋萬四州適黎賊擾動悉抵其洞穴撫平之代  
還拜右千牛衛上將軍判右金吾街仗兼六軍司事卒年六十  
五贈大尉諡元靖爲人純厚寡言重然諾好釋氏亦喜黃白術  
千繼昌字世長蔭補西頭供奉官遷如京副使補鎮國軍牙  
職入爲右班殿直東頭供奉官監大明商稅外艱服闋授西京  
作坊副使淳化中齊僊多盜命爲登萊沂密七州都巡檢使至  
道二年拜作坊使峽路二十五州軍捉賊招安旋改兵馬鈐轄  
掩殺賊酋喻雷燒進西京左藏庫使王均亂獨受詔進討砮于  
城西賊忽開城僞遁繼昌亟止雷有終等毋輒入不聽果爲賊  
所陷繼昌獨按堵如故是夕徙屯馬橋門三月破彌牟砮斬首

千級大獲器仗進逼魚橋門均脫走繼昌入城嚴戒部下無擾民者獲婦女童勿置空寺中事平遣還其家以功領獎州刺史移知青州入掌軍頭引見司景德二年帝將幸澶州遣先赴河上給諸軍鎧甲及遼人請和與其使姚東之偕詣其軍又與韓杞還至行在擢西上開門使三年副任中正使契丹是冬將朝陵以汝州近洛衛兵所駐命知州事兼兵馬鈐轄駕還知延州兼鄜延路鈐轄日疾遣醫診視改右驍衛左神武大將軍祀汾陰留爲京師新城巡檢權判右金吾街仗子駙馬寔坊入對帝問荅以彊健能飲食拜連州刺史出知涇州表求兩朝御書及謁拜諸陵皆許之卒年七十二遣中使護輓歸錄子贊善大夫文晟爲殿中丞殿直文旦爲侍禁繼昌性謹厚治尚寬簡所至民懷士大夫亦樂與遊初鄭伸以告崇矩陰事得賜進士出身

爲酸、班、王、簿、早死其母貧餓詣縣乞丐家人競訴逐之繼昌  
名見與白金百兩人稱其長者

王彥昇字光烈本蜀人後唐平蜀徙家洛陽性殘忍多力善擊  
劍號王劍兒初事宦官孟漢瓊以其趨勇言於明宗補東班承  
旨晉天福中轉內殿直遷護聖指揮使周廣順中從向拱破太  
原兵斬敵帥王瑋於陣以功遷龍捷都虞候領合州刺史世宗  
破劉崇拔金牛水砦攻瀛州下東城俱從太祖自陳橋擁還汴  
彥昇引部下先入遇韓通自內廷奔歸將爲捍禦計彥昇遂至  
其第殺通太祖惡之以建國之始不卽加罪拜恩州團練使領  
鐵騎左廂都指揮使久之爲京城都巡檢忽中夜詣王簿第意  
在求賄簿驚悸而出漫曰此夕巡警甚困就公一醉翌日簿密  
奏其事出爲唐州刺史遷申州團練防州防禦使移原州西人

有犯不加刑以手捽其耳大嚼川卮酒下之前後陷人數百敵畏之不敢犯塞以病代還次乾州卒年五十八以前專殺之故終身不授節鉞

姚內斌幽州盧龍人初仕契丹爲關西巡檢瓦橋關使顯德六年世宗北征率衆三百以城降擢爲汝州刺史吏民詣闕請留恭帝下詔褒之宋受禪後從太祖平李筠改號州刺史西夏數犯邊以爲慶州刺史兼青白兩池榷鹽使在郡十數年夏人畏其武猛攝伏不敢犯號爲姚大蟲時妻子尚在契丹乾德四年始山間道歸太祖召見賜以衣服緡錢鞍馬令中使護還開寶四年召赴闕待之甚厚遣歸治所七年春暴疾卒年六十四中使護喪葬洛陽常賻外賜田三十頃錄子承贊爲供奉官閤門祇候後死于陣承鑒至殿中丞

董遵誨范陽人父宗本善騎射隸契丹帥趙延壽麾下嘗說以  
事不能用及延壽被執與族南奔漢祖擢宗本隨州刺史署遵  
誨牙校入周從其舅高懷德北征師次高平與晉人遇遵誨先  
出奇兵逆擊大軍繼進遂敗之又隨韓通克秦鳳二州戰于唐  
倉先登陷陣擒蜀招討王鸞以獻師還補東西班押班遷號武  
指揮使太祖始徵時客遊漢東嘗依宗本遵誨常見城上紫雲  
如葢又夢登高臺遇黑蛇長百尺餘俄化龍飛騰東北去雷電  
隨之問太祖此何祥也太祖不對時遵誨憑藉父勢太祖每避  
之及與論兵事遵誨理屈拂衣而起太祖遂辭去及卽位召見  
便殿遵誨伏地請死帝令左右扶起因諭之曰卿記往日紫雲  
及化龍之夢乎又再拜呼萬歲俄部卒訴其不法十餘事帝釋  
不問益惶愧待罪諭曰朕方赦過賞功豈念舊惡可勿復憂吾



將錄用還誨感泣又問其母安在奏在幽州經難睽隔因令人  
賂邊民竊迎還之遣外弟劉綜貢馬以謝上解所服真珠盤龍  
衣命齋賜之綜謝曰還誨人臣豈敢當此上曰吾方委以方面  
不此嫌也會征澤潞還馬軍都軍頭因留鎮守再遷散員都虞  
候乾德六年授通遠軍使許以便宜制軍事初至召諸族酋長  
宴犒之諭以朝廷威德衆皆悅服後復來擾深入邊境用兵擊  
走之俘斬甚衆獲羊馬數萬在鎮十四年奔落畏服嘗有剽略  
靈武進奉使鞍馬兵器者懼還誨討盡歸之拜伏請罪還誨卽  
慰撫令去自是不敢有所犯上嘉其功就拜羅州刺史太宗時  
兼領靈州巡檢還誨素不知書然豁達無崖岸多方略能挽強  
命中委遇始終不替卒年五十六帝軫悼遣中使護葬贈賻加  
等錄其子嗣宗嗣榮爲殿直

賀惟忠忻州定襄人少勇敢善騎射周祖討三叛惟忠謁於道左自陳有武藝留置所部後隸世宗帳下奏補供奉官宋初授鸞儀副使知易州繕完亭障撫愛士卒得其死力每乘塞川兵所向必克以功遷正使開寶二年太祖駐常山以爲本州刺史兼易定祁等州都巡檢使因中流矢卒上聞之嗟悼爲人性剛果知書洞曉兵法有方略威名震北邊十餘年間契丹不敢南牧子昭度供奉官至西京作坊使知通遠軍

郭進深州博野人少貧爲傭保有膂力倜儻任氣結豪俠嗜酒蒲博後走晉陽漢祖壯其材留帳下及建號命以奇兵問道先趨洺州因定河北諸郡累遷乾坊二州刺史少帝改磁州周廣順初移淄州吏民攀留後遷登州平羣盜部內清肅顯德初移衛州衛多亡命與趙邢洺依山帶河易爲出沒伺間椎剽捕輒

遁去累歲不能絕進備知情狀設計發擣數月殆盡改洺州團練使所至多善政嘗於城四種植柳壕中種苧芰蒲葦後益繁茂郡民見之有垂涕者曰此郭公遺愛也請立碑頌德詔左拾遺鄭起撰文賜之宋祖立親征澤潞遷本州防禦使充西山巡檢入太原獲數千人征河東領前軍行營馬軍都指揮使再征復爲河東道忻代等州行營馬步軍都監招徠山後諸州民三萬七千餘口太平興國初領雲州觀察使判邢州仍兼西山巡檢賜第京城征太原先命分兵控石嶺關大破契丹又攻破西龍門砦俘馘來獻自是并人喪氣以論護軍田欽祚恣爲奸利欽祚反撫他事侵之進本武人性剛烈又恃戰功高心不能平自經死以暴卒聞太祖悼惜後知其事遂罷欽祚贈進安國軍節度使命中使護葬爲人有材幹輕財好施然御下嚴毅喜殺

士卒小違令必寘於死婢僕亦然太祖嘗遣戍西山必諭之曰汝輩謹奉法朕猶貸汝郭進殺汝矣嘗有軍校詣闕告進太祖詰知情狀曰彼有過畏死故誣進求免爾令送與之使自正法會弁人入寇進謂誣者曰汝敢論我信有膽氣今赦汝罪若能掩殺弁寇卽薦於朝其人踴躍聽命果大捷卽以狀聞遷其職進控扼十餘年無北顧憂帝多其功造宅以賜悉倣親王公主代者牛思進祁州無極人少從軍以膂力聞嘗取強弓絙於耳以手引之令滿又令力士二人撮其乳曳之不動太宗命知平定軍征河東還改本州團練使授右千牛衛上將軍致仕卒

冊曰陳橋推戴襲故徇常苟非其人終亦必亡帝王有真乃顯諸良風雲慶會史冊流芳

弘簡錄卷一百十四

終

弘簡錄卷一百十五

明刑部員外郎仁和弘齋節經邦學

皇清翰林院侍講學士四世孫遠平校閱

功臣 宋三之二

曹彬

子瑛

潘美

從孫以李超

劉廷讓

袁繼忠

張延翰

皇甫繼明

何繼筠

子承矩

李謙溥

子允正允則

張瓊

田紹斌

呼延贊

解暉

李進卿

子延

楊美

張暉

司超

曹彬字國華真定靈壽人父芸成德軍節度都知兵馬使彬生周歲父列辟盤彬左手持干戈右手持俎豆斯須取一印他無所視及長氣質淳厚漢乾祐中隨父充本軍牙將武行德見其端懿指曰此遠大器也有從母張氏爲周祖貴妃名歸京師隸

世宗帳下從鎮涇州補供奉官擢河中都監蒲帥王仁鎬以彬  
帝戚加敬彬執禮益恭公府讌集端簡終日未嘗旁視顯德初  
改潼關監軍遷西上閤門使五年奉使吳越致命訖卽還私覲  
之禮一無所受改普州都監鄰道馳書來詣素不識彬見之驚  
曰豈有國戚近臣而衣弋綈袍坐素匡牀者乎其謹飭類此遷  
引進并客省使宋太祖方典禁旅中立不倚非公事未嘗造門  
羣居燕會亦罕所與太祖深器重之建隆二年召歸謂曰我昔  
常欲親卿卿何故疎我頃首謝曰臣爲周近親復忝內職安敢  
妄有交結上益以爲然命領騎兵攻河東平樂縣降其將王超  
侯霸榮建爲平晉軍乾德初河東召契丹兵六萬騎攻平晉復  
大破之改左神武將軍兼樞密承旨二年冬伐蜀爲前軍劉光  
毅都監峽中郡縣下者諸將欲屠之彬獨申令戒戢所至悅服

兩川平。諸將多取子女玉帛。彬素中惟。圖書衣衾而已。及還上。盡得其狀。以全斌等屬吏。謂彬清介廉謹。進宣徽南院使。領鎮。義成軍。彬辭曰。征西將士俱得罪。臣安敢獨受賞。上褒其不伐。曰。勸懲國之大典。無多讓。從征太原。爲前軍都監。進檢校太傅。七年十月。總兵伐江南。爲昇州西南路行營馬步軍戰。擢都部。營分兵由荆南順流而東。破峽口。紫進克池州。當塗蕪湖駐軍。采石作浮梁跨江。以濟。破其軍於白鷺洲。新林港。明年二月。進次秦淮。大敗水陸十餘萬於城下。俘斬數萬。自三月至八月。金陵受圍。凡三時。樵采路絕。城垂克。彬忽病。疾諸將來問。彬曰。吾疾非藥石能愈。須諸公誠心自誓。以克城之日。不妄殺一人。財自愈矣。諸將許諾。共焚香爲誓。又明日。城陷。煜與臣僚百人詣軍門降。彬慰安之。煜請入宮治裝。彬從數騎待于宮門外。左右

言煜入恐有不測奈何。彬曰：煜素懷無歸，既已降，必無他慮。煜君臣卒賴以全。師還入見，刺稱奉勅江南幹事還。太祖益嘉其謙恭，賜錢二十萬。未幾拜樞密使、檢校太尉、忠武軍節度使。太宗卽位，加同平章事，議征太原。又進檢校太師，論功加侍中，爲弭德超所誣，罷鎮太平。軍旬餘，上悟其譖，待之加厚，進封魯國公。上信賀令弼言，將大舉伐契丹，以彬爲幽州行營前軍馬步水陸都部署。與崔彥進等出雄州，諸將約期將發，陞辭上，謂曰：潘美之師先趣雲、應、彬等以十萬衆聲言取幽州。彼聞大兵至，必悉衆救范陽，不暇援山後矣。旣而連下州縣，進次涿州，旬日食盡，不得已退師雄州，以援餉餽。上聞驚曰：豈有勍敵在前，反退軍援餉失策之甚！亟遣使止彬，勿前。時部下聞美及重進多得山後地，累建功而已，握重兵不能有所攻取，謀議蜂起，不得



已襄糧復進方炎暑軍士困乏糧且盡遽退無復行伍遂爲契丹所蹙而敗收衆夜渡拒馬河退屯易州軍還詔賈黃中等雜治彬等具伏違詔失律之罪責授右驍衛上將軍踰年起爲侍中連拜武寧平盧兩鎮節度使真宗復檢校太師同平章事成平二年被疾上臨問手爲和藥六月薨年六十九臨哭之慟贈中書令追封濟陽郡王諡武惠配饗太祖廟庭妻高氏韓國夫人官其親族門客親校十餘人生平仁敬和厚在朝未嘗忤旨罕言人遇伐二大國秋毫無取位兼將相不以等威自異遇士夫於塗必引車避之不名下吏每白事必冠而後見俸入均給宗族無餘積平蜀回問以官吏善否對曰軍政之外非所聞也因問之薦隨軍轉運沈倫廉謹可任趙昌言嘗因北征失律請行軍法後昌言自延安還被劾不得見彬爲請於上乃許君子

謂其能保功名守法度爲宋朝良將第一。七子珣娶秦王女興平郡主。至昭宣使珣左藏庫副使。珣虞部員外郎。珣東上閤門使。珣之女卽慈聖光獻皇后。後累贈魏王彬。韓王玘。吳王諡安禧。璩字韜光。蔭補供奉官。常從彬征討。得預計議。遷宮苑副使。出爲鎮魏。并代趙五州都監。知定州。改尚食使。領富州刺史。徙知代州。擢鎮綏銀夏麟府等州行營鈐轄。屢戰有功。至道初。遷四方館使。知靈州。徙河西鈐轄。改引進使。副范廷召將兵出塞外。艱起復爲鄜延路副都部署。趙州刺史。領武州團練使。充麟府副部署。出蕃兵邀李繼遷。俘馘甚衆。入爲樞密都承旨。轉鎮定高陽關三路行營都鈐轄。領棗州防禦使。再知定州。拜侍衛馬軍副都指揮使。連拜天德彰國保靜武寧等軍節度使。在禁衛十餘年。天禧三年。足疾授河陽節度使。同平章事。卒。年

七十贈中書令諡武懿自起貴冑以孝謹稱能奮勵以世其家  
習知韜略好讀左氏春秋善撫士卒兼著威愛綽有父風惟輕  
財稍不逮子儀官至耀州觀察使瑋字寶臣父彬在諸鎮皆以  
瑋爲牙內都虞候歷閤門祇候沉勇有謀喜讀書通春秋三傳  
李繼遷叛兵數無功太宗謀帥於彬對曰臣少子瑋可任卽召  
見命同知渭州時年十九真宗卽位改內殿崇班彬卒請持喪  
不允遷西上閤門副使徙知鎮戎軍繼遷暴虐瑋知其下多怨  
卽移書諸部諭以朝廷恩信由是康奴等族請內附繼遷略西  
蕃還瑋邀擊于石門川俘獲甚衆繼遷死其子德明請命于朝  
旣而數大族請拔帳自歸諸將猶豫不敢應瑋曰德明野心不  
急折其剛後必颺去卽日將兵薄天都山受降德明不敢拒累  
遷真定路都鈐轄領高州刺史復爲涇原路都鈐轄兼知渭州

與秦翰破章埋族分兵滅撥臧於是隴山諸族皆來獻地瑋築  
堡山外爲龍竿城募土兵守之曰異時秦渭有警此必爭之地  
也祀汾陰進四方館使踰年改引進使英州團練使復知秦州  
兼涇原儀渭鎮戎緣邊安撫使時唃廝囉強盛立遵佐之使其  
舅賞樣丹與廝敦立文法謀內寇瑋陰結廝敦解寶帶予之廝  
敦感激自效取賞樣丹首獻南市地南市者秦渭之阨也瑋城  
之表廝敦爲順州刺史唃廝囉率衆數萬大入寇瑋迎戰三都  
谷追奔斬級千餘遷客省使康州防禦使旣而河州諸城皆納  
質爲熟戶瑋乃作堊抵授囉囉蓋西藩要害也立遵聞之懼願  
罷兵歲入貢約蕃漢爲一家因使來獻馬自是唃廝囉勢蹙退  
保積中不出秦人請刻石紀功有詔褒之天禧三年德明寇柔  
遠砦都巡檢楊承吉戰不利除瑋華州觀察使鄜延路副都總

管環慶秦等州緣邊巡檢安撫使拜宣徽北院使鎮國軍節度  
觀察留後簽書樞密院事丁謂惡不附已指爲準黨謫左衛大  
將軍容州觀察使知萊州謂敗復原職知青州以彰化軍留後  
知永興軍歷昭武彰武二軍節度使知天雄守河陽爲真定府  
定州都總管卒贈侍中謚武穆其爲將寬大不如父然自爲一  
家善用士卒得其死力平居甚閒暇臨事多出奇計神變不測  
一日張樂宴僚吏中坐失瑋所在明日徐出視事賊首已擲庭  
下矣又嘗稱疾加砭臥間不出聞賊至奮起裹劍被甲跨馬賊  
望見皆走將兵幾四十年未嘗失利旃旆聞瑋名卽東衙合  
手加額契丹使過天雄部勒其下曰曹公在此毋馳驅也真宗  
慎兵凡議邊事必手詔詰難至十數反而瑋守初議卒無以奪  
他將有論往往密付處分有告謂卒叛入夏國者漫曰吾使之

耳有頭斬首投境上。其善應變如此。羌俗殺人入羊馬贖罪。瑋令自相犯者。從其俗。犯邊民者。論如律。自是無敢犯。所募弓箭手皆土人。習知障塞蹊隧。曉羌語。耐寒苦。前此未嘗官給糧械。瑋給以境內閑田。又使馳射較其強弱。弱者益與田二頃。俾得耕斂。而蠲其租。環慶屬羌田多爲邊人所市。羸弱不能存。瑋令盡還故田。敢有犯者。遷其家。屬羌多降。因制百帳以上。其首領爲本族軍主。次爲指揮使。又次爲副指揮。止於本軍敘進。不令他徙。開邊濠。率令深廣丈五。遇山險不可塹者。因其峭絕治之。使足限敵。後皆準以爲法。山東士賈同造謁客外舍。瑋適欲按邊。邀與俱。同問兵所在。曰已具。既出。帥甲士三千環立。初不聞人馬聲。同驚語人曰。瑋真名將也。嘉祐八年。配享仁宗廟庭。

冊曰。江南何罪。帝心孔明。逆攻緩取。協我真情。有命自天。

惟德之行三王胙土二廟割牲宋代功臣罕與爲朋

潘美字仲詢大名人父璘爲漢軍校戍常山美少倜儻隸府中  
典謁預知漢祚不永嘆曰大丈夫不以此時立功成名碌碌何  
爲周世宗尹開封事爲中涓卽位補供奉官遷西上閤門副使  
改引進使太祖遇美素厚及受禪命先往見執政諭旨中外陝  
帥袁彥兇險嗜殺太祖慮其爲變遣美出監其軍美單騎往諭  
以天命旣歸宜修臣職彥遂入朝上喜曰美不殺彥能令來歸  
成我志矣征李重進爲行營都監事平以功授秦州團練湖南  
初定授美潭州防禦使乾德二年從丁德裕等率兵克郴州自  
唐以來溪峒蠻獠不時侵略爲民患美窮其巢穴多所殺獲餘  
加慰撫羣落遂定征嶺南爲貴州道行營諸軍都部署朗州團  
練使其年十月進克富州張驅將卒萬餘來援與戰大破之遂

克賀州下昭桂連三城西江諸州以次皆降移南面都部署進次韶州韶乃廣之北門銀聚衆十餘萬美揮兵進拔之斬獲數萬銀窮蹙遣樹僚王珪詣軍門求通好復遣僕射蕭灌舍人卓惟休奉表乞降美諭以上意能戰則戰不能戰則守不能守則降不降則死不死則亡非此五者他不得受令殿直持彥袞部送灌等赴闕銀復遣其弟保興率衆拒戰美淬厲士卒倍道趨柵頭距廣百二十里銀兵十五萬編竹木爲柵依山壑谷堅壁以待美分遣丁夫千人持二炬火其柵選銳師夾擊之衆遂大敗長驅至廣擒銀送京師露布以聞命知廣州兼理市舶拜山南東道節度兼嶺南轉運使土豪周思瓊聚衆負海爲亂復討平之嶺表遂安征江南命副曹彬爲昇州行營都監盛言可取之狀進次秦淮吏白舟楫未具美曰受詔提驍果數萬期於必



克豈限此一衣帶水不徑渡乎麾衆競涉吳師大敗及浮梁成敵戰艦二十餘汭流來爭美麾兵奮擊奪其艦擒將鄭賓等七人又破城南水砦守以舟師分大軍列三砦美居北偏圖其形勢來上太祖指北砦語使人曰吳兵夜必來寇速成深溝以自固無墮其計既成果來襲美依新溝拒之吳兵大敗又命大置戰懼以防他變自三月至於八月戰連捷遂克潤州進薄金陵江南水陸十萬陳於城下美擊敗之李煜危甚奉表乞緩師上不省仍詔諸將促令歸附煜夜遣兵數千持炬鼓譟來犯美率精銳以短兵接戰晨夜急攻百道俱進金陵平以功拜宣徽北院使太宗卽位改南院使加開府儀同三司征太原命爲北路都招討使判太原行府事屢敗漢兵部分諸將進築長連城圍之矢石交下如雨援兵又絕并州遂平征范陽以知幽州行府

事及班師命兼三交都部署留屯以捍北邊三交西北三百里地名固軍其地險阻爲北邊咽喉美潛師襲之據有其地因積粟屯兵以守自是北邊以寧嘗巡代州方秣馬募食遯兵適至警衆銜枚奮擊大破之封代國公改忠武軍節度使進韓國公北征以爲雲應朔等州兵馬都部署副以楊業出雁門戰不利楊業死之詔削秩三等責授檢校太保論太原功復檢校太師知真定府未幾改判并州加同平章事數月卒年六十七贈中書令謚武惠配饗太宗廟庭子五惟德宮苑使惟固西上閤門使惟正西京作坊使惟清崇儀使惟熙娶秦王女官平州刺史女卽章懷皇后美後追封鄭王從子惟吉累資爲天雄軍駐泊都監雖連戚里能以禮法自飭敷歷中外人咸稱其勤敏從孫夙字伯恭天聖中上書論時政授仁壽主簿久之知韶州擢

江西運判提點廣西湖北刑獄邵州蠻叛遷轉運使專制蠻事  
親督兵破其團峒九十徙知滑州改湖北轉運知桂州坐匿名  
書誣判官韓繹謫監隨州酒稅起知光化軍舉將才易端州刺  
史再徙鄜州召對訪交廣事稱旨遷司封郎中直昭文館復知  
桂州神宗諭以卿將家子委任要藩宜體朕意悉心經度至卽  
上書陳交趾可取狀將發兵未報徙河北轉運使歷度支鹽鐵  
副使知河中章惇察訪荆湖陳夙憂邊狀以知潭州再遷光祿  
卿知荆南鄂州卒年七十 李超者冀州信都人爲禁卒從美  
軍中主刑刀美乘怒殺人超每潛緩之怒解輒得釋以是全者  
甚衆生子游字德淵中進士累擢祕書監知康州咸平中入爲  
刑部詳覆御史臺推直官遷開封推官賜緋魚景德初拜虞部  
員外郎侍御史知雜事賜金紫從幸澶淵還與陳堯咨安撫河

北踰年判吏部銓居憲府未再歲帝寵待之擢樞密直學士尋知開封能檢察隱微京師稱之累遷至右司郎中出知秦州人以是稱其陰德

冊曰伐國不問二將顯名彼爲約誓此乃迅征叶謀合德施報孔明章懷並后武惠同旌沿及鼓刀陰德沾嬰

劉廷讓字光義曾祖仁恭祖守文見唐藩鎮父廷進避守光之亂與廷讓皆南奔廷讓少有膂力隸周祖帳下廣順初補內殿直累遷龍捷都校世宗征淮南以功領雷州刺史涪州團練使領鐵騎右廂宋初轉龍捷右廂江州防禦使征李筠爲行營先鋒建隆二年改侍衛馬軍都指揮領江寧軍節度使伐蜀爲四川行營前軍兵馬副都部署率禁兵及諸州步騎二萬由歸州進入境連破松木三會巫山等砦獲蜀將南光海擒戰樞指揮

袁德宏奪戰艦三百餘艘俘水軍三千人因渡南岸復斬首三千餘級上初示夔州地圖有鎮江浮梁上設敵棚三重夾列砲具上曰我軍至此慎勿以舟師爭利當先引步騎陸行出其不急擊之俟其勢却卽用戰權夾攻取之必矣廷讓奉詔距鎮江三十里舍舟步進先奪其橋後牽舟而上守將高彥儔自焚遂進克萬施開忠四州峽中郡縣悉下次遂州守將陳愈宰吏民降遵命盡出府庫金帛以犒將士亦上指也以故人皆效命所至成功及還他將皆左降惟廷讓秋毫無犯以功改領鎮安軍征太原拜鎮寧軍節度使太宗召爲右驍衛上將軍北征失律罷節鎮居環列旣而契丹擾邊議遣將因擢知雄州徙瀛州爲兵馬都部署契丹數萬騎來侵與戰於君子館天大寒兵士弓弩皆不能發被圍數重初廷讓分精兵屬李繼隆爲後殿令綴

急相援及是繼隆退保樂壽廷讓一軍皆沒僅以數騎獲免詣闕待罪上知爲繼隆所誤不之責復命知雄州有疾求歸京師不俟報遽離屯所帝怒下臺按問削秩配隸商州遂怏怏不食終于華州年五十九錄舊贈太師子永德永錫永崇內殿崇班永恭西京作坊副使永和內殿承制永保永昌永規永淳及孫允忠並閤門祇候

袁繼忠振武人徙并州周階州防禦使進之子蔭補右班殿直宋平澤路討并汾悉預攻戰征蜀隸劉廷讓有功知雲安軍歷嘉蜀二州監軍伐廣南爲先鋒遷供奉官護隰州白壁關屯兵時河東拒命累入其境破三砦擒將校二人得生口馬牛鎧仗踰萬計遂略地忻代州改天平軍巡檢太宗卽位遷閤門祇候令擊破梅山洞賊又巡邊部於唐龍鎮從征太原預破鷹陽

軍先登陷陣契丹入代境率兵擊走之遷通事舍人護高陽關屯兵破契丹長城口殺獲數萬聖書褒美會趙保忠來朝獻地綏州刺史李克憲偃蹇不奉詔遣繼忠諭旨竟率克憲入朝遷西上閤門副使又命率兵定河西諸州大破西人於葭蘆州遷引進副使護定州屯兵遷閤門使大將田重進征契丹命繼忠爲定州路行營馬步軍都監取飛狐下靈丘平蔚州擒其帥大鵬翼以獻師還殿後行列甚整重進欲殺降卒繼忠悉救免之遷判四方館事領播州刺史易州靜塞騎兵尤驍果大將李繼隆取隸麾下旣而契丹陷靜塞城盡俘騎兵妻子繼隆疑此軍怨已欲分隸諸將繼忠曰不可但奏升其軍額優以廩給使之盡節可也衆皆感悅繼忠因自請隸麾下會契丹大入駐唐河北諸將欲堅壁待之繼忠曰今疆敵在近城中屯重兵不能剪

滅。顧令長驅深入。豈折衝禦侮之道乎。我將身先士卒。以死寇難。辭氣慷慨。衆壯之。靜。軍摧鋒先入。契丹大潰。帝聞。聖書獎諭。厚賜。予之。遷。引進使。護鎮定。高陽。關。兩路屯兵。以病卒年五十五。爲人長厚。忠謹。士大夫多與之遊。前後賜資鉅萬。悉以犒士。旣死。家無餘蓄。子用成。雍熙初。登進士。至太常博士。

張延翰。澤州陵川人。初爲親校。從漢祖入汴。補內殿直。遷東西班軍使。周初。改護聖指揮使。從世宗平淮甸。遷鐵騎右第二軍。并殿前散都頭。都虞候。宋初。權鐵騎左第二軍都校。領開州刺史。從平揚州。以功遷。控鶴左廂都指揮。領果州團練使。伐蜀。爲歸州路行營馬軍都指揮。隨劉廷讓師次夔州。頓兵白帝廟西。蜀將武守謙拒戰。逆擊敗之。拔其城。授侍衛馬步軍都虞候。領彰國軍節度使。開寶二年。寢疾。太祖親臨問。卒年五十三。贈侍



中 皇甫繼明冀州移人汾川令濟之子善騎射以膂力聞太祖補殿前指揮使歷左右番押班都知太宗累遷捧日軍都指揮使領相州刺史坐秦王廷美出爲汝州都指揮雍熙初歷捧日右廂都指揮使領澶州刺史田重進北征爲前鋒以功加馬步軍都軍頭領羅州防禦使副高瓊爲并代部署又副范廷召爲兵馬都部署改高陽關領洋州觀察使充環慶路馬步軍都部署爲人謹忍御下嚴肅士卒頗畏憚之受詔護送輜重赴靈州被病卒年六十三贈彰武軍節度遷其子懷信爲供奉官何繼筠字化龍河南人幼時與羣兒戲能爲行伍戰陣之象父福進歷事後唐至周累官忠武成德天平三節度繼筠屢署衙內都校與并人戰有功領欽州刺史契丹將高模翰擾深冀與虎捷都指揮劉誠誨率兵拒之至武強獲老稚千餘模翰遁去

隨父入朝補內殿直父卒起復濮州刺史改棣州令戍靜安軍  
世宗征瓦橋關以所部兵出百井道破并人數千恭帝轉西北  
面行營都監宋初升棣州爲團練卽以充使俄加本州防禦監  
關南兵馬從征太原爲先鋒部署至渦河與并人遇擊走之奪  
汾河橋敗其衆于城下獲馬五百疋擒其將張環石贊以獻太  
祖親征晉陽時繼筠屯兵陽曲驛召至行在授以方略令赴石  
嶺關拒契丹援兵期翼日亭午奏捷至期帝御北臺果見一騎  
北來乃其子承胤來獻捷生擒遼刺史二人斬首千餘級獲生  
口百餘及馬疋器甲甚衆以功拜建武軍節度判棣州開寶三  
年來朝賜鞍馬戎仗尋以疽卒年五十一贈侍中爲人深沉有  
智略前後備邊二十年與士卒同甘苦得其死力邊人多嚮像  
祠之 子承矩字正則幼爲棣州衙內指揮使從討劉崇擒獻

其將胡澄授開府副使陳洪進納土太宗詔乘傳監泉州兵與  
喬維岳王文寶討平仙遊莆田寇盜有功就遷開府使改崇儀  
使疏爲政害民者數十事遷知河南罷調丁男轉送上供徙知  
潭州凡六年固固屢空詔獎之厚待僚佐王旦李沆入爲六宅  
使端拱初領潘州刺史護河陽屯兵副米信知滄州疏言臣効  
侍先臣征行知北邊道路川源形勢甚悉若干順安砦西開易  
河蒲口導水東注于海東西三百餘里南北五七十里資其陂  
澤築隄貯水爲屯田可遏敵騎奔軼俟期歲間悉墾闢南諸  
汭播爲稻田其緣邊州軍臨塘水者止留城守軍士不煩發兵  
廣戍收地利以資邊設險固以防塞春夏課農秋冬習武休息  
民力以助國經如此數年彼弱而勞我強而逸此禦邊之要策  
也上嘉納之卽拜制置河北緣邊屯田使興築修舉民賴其利

淳化四年擢西上閤門使知滄州踰年徙雄州御書錄其功最  
仍賜弓劔益推誠御衆同其甘苦令邊民告機事動息輒知至  
道元年春府州殺獲契丹承矩條其數揭於市契丹怒夜襲城  
下承矩整兵出拒遲明列陣酣戰久之斬馘甚衆擒其酋鐵林  
相公上恐其輕率致寇命與滄州安守忠兩換其任及魏廷式  
表上功狀遣內侍劉勅覈實麾下皆被擢資真宗卽位復知雄  
州詔諭凡有事機務在得中乃貽書契丹諭以懷來之旨咸平  
二年詔聽邊民越拒馬河通市承矩上言緣邊戰懼司自洹河  
至泥姑海口屈曲九百餘里天設險阻太宗置砦一十六鋪百  
二十五戍卒三千餘舟百艘往來巡警以備奸詐大爲要害若  
聽公私貿易人馬交度深非便宜砦鋪皆爲虛設上卽停前詔  
手札褒之三年召還拜引進使州民詣闕貢馬借留復遣之上

言兵有三陣。天陣。日月風雲。地陣。山陵水泉。人陣。兵車士卒。今  
用地陣而設險。以水泉而作固。建設陂塘。綿亘滄海。縱有敵騎。  
安能折衝。昨者犯高陽。一路士庶安居。卽屯田之利也。但緣邊  
守將多非其才。制御無方。動誤國事。伏望慎擇疆吏。出牧邊民。  
厚之以奉祿。使悅其心。借之以威權。使嚴其令。又欲料民爲三  
等。凡有膽勇者。效力顯忠。樂進戰者。能踰高赴遠。輕足善鬪者。  
各聚爲一。俟契丹有警。令智勇將統而用之。必能奏功。乃中國  
之長算也。其榷場之設。先朝從權立制。以惠契丹。今因其犯塞。  
卽停罷。似失大體。去歲于雄州置場賣茶。雖貨貨並行。未有  
所濟。乞延訪大臣。議其可否。又建議選銳兵於乾寧軍。挽刀魚  
船自界河直趨平州境。以牽西面之勢。五年復兼制置屯田。使  
始建榷場。未幾因契丹窺伺。殺斥候卒。復罷之時。邊城大浚渠。

契丹頗撓其役詔承矩握兵深入以分其勢遣卒出混泥城襲之而還景德元年入朝進英州團練使上語宰臣曰承矩讀書好名以林能自許宜擇善地處之冬出知涇州金使韓杞至承矩奉命郊勞明年春復知雄州會契丹遣使奉幣承矩悉以朝廷待邊人之禮悠久可行者上聞手詔嘉納三年真拜雄州團練使兼綜邊安撫使有詔誘邊民復業承矩恐契丹致疑易詔文爲水旱流民王欽若劾承矩擅改詔書請加罪帝優假之詔自今朝旨有未便者奏稟進止生平頗有識鑒復善推步自知其數以老疾求歸郡詔擇代者得李允則改授齊州團練使至郡裁七日卒年六十一贈相州觀察使賻錢絹護葬緣邊涿易州民相率詣雄州發哀飯僧子龜齡侍禁九齡殿直退齡齋郡昌齡娶齊王女大和縣主至內殿崇班孫象中閣門祇候

李謙溥字德明并州孟人父堯署晉祖參謀天福初爲開封推官言柄節契丹非久長策晉祖不悅出爲魯山令卒謙溥性慷慨重然諾通左氏春秋從晉祖入汴補殿直奉使契丹漢初遷東頭供奉官周祖討三叛及守鄴都往來宣布密命甚愛之廣順初遷其備庫副使世宗征劉崇遣說遼州刺史張乙以城降論功改開府使爲晉州兵馬都監世宗親征淮南以大寧咽喉要地署謙溥權隰州至卽嚴防守備凡八日并人果以數千騎來寇拒却之後旬餘大發衝軍攻城謙溥募敢死士縋城與楊廷璋合勢夾攻并人大擾悉衆遁去明年攻破孝義縣以功領衢州刺史改丹州謙溥少與宣祖同里閭弟謙昇爲太祖布衣交母聞氏嘗厚待太祖旣卽位數迎聞氏入宮命左右掖之坐賜飲食話舊故賞賚優厚建隆四年移謙溥磁州兼晉隰緣邊

都巡檢行石州事以與同砦爲治所會命四路進兵略地太原以謙溥爲先鋒因畫攻取之策諸將共沮之不用軍還次谷口謙溥語諸將曰王師旣退彼必來乘我當亟備之亦不聽乃獨令所部擐甲以待俄追騎至諸將倉皇走謙溥獨麾兵拒戰并人引退拜隰州刺史征太原爲汾州都監征晉陽命監東砦會黨進伐木西山并人來逼大將趙贊禦之不退謙溥亟麾所部赴之太祖遽至甚喜在州十年敵人不取犯境有招收將劉進勇力絕人撫之甚厚得其死力恆以少擊衆并人患之遣間書道中贊得之以間謙溥願以舉宗四十口保進不反帝悟釋之以爲禁軍都校賜戎帳服具地感激願自効尋遷謙溥濟州團練使後邊將失律復以爲晉隕緣邊巡檢使領兵入太原連拔七砦以疾求歸卒年六十二上痛惜之賻贈給葬雍熙中太宗



爲許王納謙昇女爲夫人至如京副使子允恭內殿崇班閤門  
祇候 謙溥子允正字修已蔭補供奉官太平興國中管左藏  
庫掌三班遷閤門祇候通事舍人淳化中命討瀘州蠻遷西上  
閤門副使提領京城慮因請詔御史臺給印紙作囚簿署禁繫  
月日庶無淹滯詔從之又提點左右藏屢乘傳北面經度邊要  
五年爲衛州修河部署會建清遠軍積石砦命詣瀚海部分其  
役還拜閤門使并州駐泊鈐轄俄知州事徙代州咸平初使貽  
詢訪民事歷知鎮莫誠延定五州進四方館客省使領河州團  
練使爲并代涇原儀渭邠寧環慶馬步等軍鈐轄兼安撫都監  
與錢若水同詣沿邊諸砦經度邊事代馬知節爲鄜延部署兼  
鎮定都鈐轄允正頗知書性嚴毅疎財喜自修飭素病痢僕以  
是罕在要近累典邊任多殺戮徙永興軍卒年五十一 允則

年垂範少以材略聞蔭補衙內指揮使改左班殿直太平興國  
七年置椎場靜戎軍命典其事還使決河東路繫囚又使察判  
湖官吏檢視錢帛器甲刑獄擢閣門祇候繕治京師諸河泐水  
門及鄭州水碓西川賊平上官正議建城未決遣允則往視還  
言宜如正議又言兵分則緩急不爲用請併屯要害以便饋餉  
高溪州蠻叛又遣詣辰州與轉運使張素荆南劉昌言計事悉  
招輯之真宗遷供備庫副使知潭州除湖南馬氏暴斂地稅屋  
稅牛死估骨稅及民輸茶定爲制皆稱其便湖湘多山田可以  
藝粟民脩不耕允則下令月所給馬芻皆輸本色由是山田悉  
墾民饑請以家貲爲質發廩賤糶募堪役者隸軍籍得萬人轉  
運使欲發戍邵州固請得罷安撫陳堯叟列治狀以聞遷洛苑  
副使知滄州浹浮陽湖葺營壘開渠穿井遇契丹來攻老幼皆

入堡而水不乏。遂解去。轉西上。閤門副使知瀛州時契丹議和。請擇邊將謹誓約以薦。改雄州遷東上閤門使。領獎州刺史。城北舊有甕城。欲合爲一。恐契丹以爲違約。乃先建東嶽祠。道以鼓吹。居人爭獻財帛。托言有盜。以護祠爲名。大興浚築。敵始不疑。取西山材以爲倉庫營舍。教民陶瓦甃標里。開置坊市。邸舍水磴。城上悉建甍。下環爲溝。時以柳廣閭。承瀚所修屯田。架石橋。構亭榭。列隄道。以通安肅廣信順安等軍。歲修禊事。名界河。戰棹爲競渡。以習水戰。徽州北望樓。平陷馬院。爲諸軍蔬圃。浚井疏洫。列畦隴。縱橫築短垣。敵不得逞。徙浮圖北原上。旦夕登望。可三十里。沿邊隙地。悉令種榆。步兵出入便利。且資屋材。歷四方館。引進使高州團練使。天禧二年。以客省使知鎮興潞州。領康州防禦使。天聖六年卒。允則不事威儀。間或步出。遇民可

語者延坐與語以是洞知人情訟至無大小面訊立斷善撫士卒皆得其用盜發輒獲人亦莫知所由身無兼衣食無重羶不畜資財在河北二十餘年事功最多其方略設施後人咸莫敢襲至於國信往來費用儀式亦多裁定

張瓊館陶人少有勇力善射隸周祖帳下宋太祖從世宗南征擊十八里灘若爲嚴艦所圍一將甲盾鼓譟而前衆莫敢當瓊引弓一發而路淮南遂却及攻壽春太祖乘皮船入壕城上弩射矢大如椽瓊亟以身蔽太祖矢中瓊股死而復蘇鏃著髀骨不可拔瓊索酒滿飲破骨出之血流數升神色自若太祖壯之卽位擢典禁軍累遷馬步軍都頭領愛州刺史時殿前衛士如狼虎者不啻萬人故太宗自爲都虞候以統制之及尹開封太祖謂非瓊不能統卽命代爲都虞候遷嘉州防禦使性暴無機

多所凌轢時史珪石漢卿用事珽輕侮之二人銜之切齒發其  
擅乘官馬納李筠隸僕畜部曲百餘人恣作威福數事下獄賜  
死旣死太祖問其家無餘財止有僕三人甚悔之乃詰責漢卿  
優恤其家時子尚幼擢其兄進爲龍捷副指揮使

田紹斌汾州人初事河東劉鈞爲佐聖軍使戍遼州後歸世宗  
補驍武副指揮使宋初征李筠攻破大會砦以功遷龍捷指揮  
使又敗筠於茶碾村筠退保澤州紹斌鑿濠圍守疏矢中左目  
殺晉軍益衆奪其鎧甲討李重進壁揚州城南圍三日城潰斬  
首千級賜袍帶緡帛補馬軍副都軍頭下荆湖平嶺南皆從行  
討蜀隸劉廷讓率所部敗全師雄黨於神泉鎮劔道梗因賴以  
寧太祖遣孫晏齎詔賜資留蜀三歲還收龍捷三都虞候以盜  
貨官馬當死上惜其驍勇特恩釋之密賜白金征江南擇諸軍

善步關者得五百人命領之又率雲騎二千抵昇州城下克獲居多太祖討河東從何繼筠扼契丹兵于北百井奪鼓幟而還太平興國初擢龍衛軍指揮使領江州刺史擊梅山蠻洞至邵州蠻酋符漢陽死其衆大潰擒蠻二萬餘斬之諸洞驍服賜金帛緡錢金帶鞍馬歷天武日騎軍指揮使改馬步都軍頭戍鎮定高陽關爲曹彬先鋒遇契丹兵力關奪其牛羊器甲師還領溪州團練冀州防禦淳化中爲河中同丹坊鄜延橫嶺蕃界都巡檢使會鄭文寶議立席鷄城砦紹斌領其役賜名清遠軍令知軍事至道元年拜會州觀察使充靈州馬步軍部署數部儲糧金帛詣清遠軍已而率兵抵鹹井至蒲洛河援接皇甫繼明白守榮值繼明卒守榮師行後期爲賊所及伏發大敗丁夫貽愕多蹂踐至死紹斌獨率所部徐還優詔褒美從李繼隆范延

召討李繼遷就命爲本州都部署兼內外都巡檢使繼隆以蒲  
洛之敗上聞言紹斌握兵不顧有異志太宗怒遣使逮鞠貶右  
監門衛率府副率虢州安置真宗召授右監門衛大將軍領敘  
州刺史萊州防禦復爲環靈清遠部署慶州有野鷄族數爲寇  
掠召其酋帥三人斷臂馘剗放還自是患息咸平二年復領鎮  
定高陽關路押先鋒隸傅潛潛遣與石普並皮保州普陰與知  
州楊嗣出兵擊賊及夜未還紹斌疑其敗剗率兵赴之普嗣果  
爲賊所困至則合兵疾戰斬獲甚衆以功遷邢州觀察使潛屯  
中山得紹斌書言契丹大至但列兵唐河背城與戰慎無窮追  
潛聞之懼不敢出賊衆益肆焚劫及潛被逮詞連紹斌仍黜爲  
副率送往上都禁其出入五年授右千牛衛將軍景德初起更  
左龍武軍永城兵馬都監復徙考城祥符初領長州刺史東封

遷左領軍衛大將軍康州團練使終章縣都監年七十七少長兵間習戰法累以格鬪立功至老壯健猶不減性勇悍暴戾與同職不叶故屢被黜子守信內殿崇班閤門祇候

呼延贊太原人周淄州馬步都指揮使琮之子少爲驍騎卒太祖以其材勇補東班長遷驍雄軍使從討西川當前鋒身中數創以功補副指揮使太平興國初太宗親選軍校以爲鐵騎軍指揮使從征太原先登乘城及堞而墜者數四賜金帛獎之俄從崔翰戍定州擢馬步軍副都軍頭稍遷內員僚直都虞候獻陣圖兵要及樹營砦之策求領邊任召見自陳武藝贊具裝執轡馳騎揮鐵鞭聚梨旋繞廷中數四又引其四子必興必改必求必顯以入更迭舞劒盤梨各賜白金衣帶端拱二年領富州刺史加都軍頭迭刺保遼扶三州以不能治民改冀州副都部



署康州團練使眞宗嘗補軍校皆敘已功或至謹譁贊獨進曰臣月奉百千黍幸多矣不敢更求遷擢再拜而退元德皇太后園陵命掌護儀衛及還而卒贊有膽勇驚悍輕率常言願死于敵徧文其體爲赤心殺賊字至妻孥僕使皆然諸子耳後刺曰出門忘家爲國臨陣忘生爲主所作破陣刀降魔杵鐵折上巾兩旁有刃皆重十數斤絳帕首乘騅馬服飾詭異然性誕不近理冬月以水沃孩幼冀長耐寒而勁健其子病復刲股爲羹療之後必顯擢爲副都軍頭

解嘲洺州臨洺人少有勇力父珪應募爲州兵後唐天成中沒於陣得隸兵籍戍鴈門與契丹接戰斬首七級獲酋長一人遷奉國軍隊長歷晉至周爲虎捷第一軍都虞候宋初從征澤州力戰日中流矢師還策勳爲內外馬步軍副都軍頭充湖廣道

行營前軍戰懼都指揮使潭州平璽書獎諭僞統軍黃從志據岳州暉率舟師討平之生擒從志及將校俘斬溺死者衆改控鶴石第二軍都指揮使領高州刺史詔領所部軍屯上黨從李繼勳略太原破其軍于境上斬首掠獲改均州刺史太平興國二年詔於潞州北亂柳石園中築城名威勝軍以爲軍使從征并州率所部先下降州殺三百餘人擒招討使李詢獻于行在賜予有加復隸城西分管攻城及降賜宮女三人遷本州團練使知霸州雍熙初充雲應寰朔忻代等州都巡檢使代歸被病改右千牛衛上將軍致仕卒年八十爲人鷙猛木強每受詔征伐常身先之人所憚者視之若甚易由是頻立戰功金創徧體時稱驍將子守顥內殿崇班至閭門祇候

李進卿晉陽人以驍勇隸護聖軍晉天福中杜重威敗安重榮

於宗城力戰有功擢爲興順軍校周祖開國命領所部兵戍靈壽久之遷龍捷指揮使顯德初戰高平改鐵騎指揮歷散員左射補校內殿直都虞候宋初領貴州刺史三遷鐵騎控鶴虎捷左廂都指揮使領乾漢澄三州團練使伐蜀爲歸州路行營步軍都指揮使拔巫山砦下夔萬二州錄功拜侍衛親軍步軍都虞候領保順軍節度親征河東留爲在京都巡檢還改親軍馬步軍都指揮使領靜江軍節度卒年五十九贈侍中子延信內殿崇班延渥蔭補供奉官爲閤門祇候三遷西京左藏庫使咸平初歷平戎寧邊順安軍保州威武軍鈐轄知冀瀛二州景德初契丹大舉入寇經胡蘆河踰關南抵城下晝夜鼓譟四面夾攻旬日延渥率本州強壯又集貝冀巡檢史普所部乘城發礮石巨木擊之榮榮而墜翌日契丹王復與其母親鼓衆急擊

發矢如雨。延渥益分兵拒守。契丹遁去。死傷萬計。獲鎧甲兵矢竿牌數百萬。驛書以聞。賜錦袍金帶。將士緡錢遷延渥本州團練使。擢通判。陸元凱國子博士。賜緋推官。李翔太子中允。叅軍。蔡亨右贊善大夫。監押王誨殿直史普內殿崇班。初戊棚垂板護城。纔數寸許。契丹射之。矢集其上。盈二百餘。真宗詔取視。頗嘉其勞。又聞元凱流矢中面。加屯田員外郎。普勇敢不避。加尚食副使。普尋卒。錄其子昭度爲右侍禁。昭儉爲奉職。徙延渥知邢州。歷天雄軍貝州副都部署。知冀貝博三州。祥符八年入朝。以疾賜告。換右領軍衛左武衛二大將軍。致仕。卒。子宗禹內殿崇班。

楊美并州文水人。本名光美。避諱省狀貌雄偉。武力絕人。以豪俠自任。周祖征三叛。杖策詣軍門。與語壯之。留帳下。廣順初累

遷禁軍大校世宗征淮南以功擢鐵騎都指揮使領白州刺史  
與宋祖故舊卽位授內殿直都知建隆三年升青州北海縣爲  
軍以爲軍使政尚簡易民咸德之乾德二年名還北海民詣闕  
乞留遷馬步都頭討蜀授歸州路收糧左右廂都指揮使蜀平  
遷內外馬步軍都軍頭歷遷虎捷左右廂領河西軍節度使征  
太原爲行營馬軍都虞候太平興國二年出爲保靜軍節度使  
以疾解官卒年四十八贈侍中命中使護葬爲人任氣好施凡  
得賜予及奉祿盡賜給親戚故舊死之日家無餘財人多嘆息  
之

張暉幽州大城人後唐清泰初隸松鶴軍累遷奉國弩手都頭  
晉開運末與武行德奪契丹甲船于河陰爲河陽弩手指揮使  
漢祖入汴迎于榮陽授懷州刺史周廣順初改沂州宋初從征

澤潞爲行營。塚砦使先登。陣陷。遷華州團練使。有治狀。建隆二年。太原未下。詔入問計。對曰。澤潞經李筠之後。瘡痍未復。軍旅一興。恐人力重困。不若戢兵育民。俟稍富庶而後爲謀。賜襲衣金帶鞍馬。議伐蜀。遷鳳州團練使。兼緣邊巡檢。塚砦橋道使。盡得山川險易。密疏陳之。太祖大悅。以暉充西川行營都指揮使。督兵開大散關。路躬撫士卒。且役且戰。入志其勞。至青泥嶺卒。天禧中。妻年百五歲。詔賜束帛。錄孫永德三班借職。

司超。大名元城人。初事邢帥安叔千。又依漢祖。于太原隸帳下。爲小校。漢祖將渡河。遣先領勁騎。由晉絳趨河陽。及入汴。以爲鄆州必敵。指揮使遷宋宿亳三州遊奕巡檢使。改宿州西固鎮。守禦都指揮使。移屯潁州。下蔡鎮與淮人戰。有功。討淮南爲步軍先鋒副都指揮使。盧壽光黃等州巡檢師還。改光州刺史。敗

吳軍三千禽刺史施仁望陞舒州團練使宋初命副宋偃領舟  
師巡撫江徼初升舒州爲防禦卽以趙充使征李重進以爲前  
軍步軍都指揮使及平遣歸治所建隆三年遷蔡州防禦使改  
絳州徙晉州兵馬鈐轄又副趙贊爲邠州行營都部署進攻河  
東爲行營前步軍都指揮使改鄭州防禦開寶七年將討江左  
以超久在淮右習知江山險易徙蘄州防禦行至淮西卒年七  
十一天禧元年錄孫文睿爲三班奉職